

# PORTA

**B**ehram-begova medresa je u posljednjih dvanaest godina postigla dobre rezultate na polju odgoja i obrazovanja. Najvjerniji pokazatelj ovog uspjeha su entuzijizam profesora i učenika, te široki dijapazon realiziranih aktivnosti i postignutih rezultata. U prethodne dvije školske godine (2013/14. i 2014/15.) Medresa je uspješno odbranila prvo mjesto na vrednovanju učenika srednjih škola koje provodi Pedagoški zavod TK. Učenici i profesori su učestvovali u realizaciji brojnih poduhvata edukativnog, kulturnog i humanitarnog karaktera.

Radosni smo da vašoj čitalačkoj pažnji možemo ponuditi *Kapiju*, 2. broj godišnjaka Behram-begove medrese, u kojem su, pored znanstvenih radova profesora, sadržane i informacije o realiziranim aktivnostima u prethodne dvije školske godine (2013/14. i 2014/15.), osnovni podaci o maturantima koji su okončali školovanje u Medresi u ovom periodu, te informacije o hafizima učenicima i alumnistima Medrese, koji su uspješno položili hifz i stekli časno znanje hafiza u ovom periodu. Vrijednost ovog izdanja *Kapije* osnažena je činjenicom da će vašoj pažnji biti predočena u godini u kojoj Behram-begova medresa obilježava veliki jubilej – 390 godina tradicije svoga rada.

Prvi dio *Kapije* otvoren je radom *Slovo o Medresi*, autorice Emine Hatunić, u kojemu je ona evocirala sjećanja i uspomene na vrijeme re-

aktiviranja Medrese, pa sve do danas. Radovi iz oblasti *tefsira, odgoja, kulturne tradicije i književnosti* razvrstani su po poglavljima: *Kapija sjećanja, Kapija tefsira, Kapija odgoja, Kapija kulturne tradicije, Kapija književnosti i Kapija Medrese*. Imajući u vidu da je Behram-begova medresa odgojno-obrazovna institucija, te da su nam iskustva iz oblasti odgoja i obrazovanja iznimno značajna, u *Kapiji 2* dominantno su zastupljeni radovi iz oblasti odgoja.

U drugom dijelu, rukovođeni izrekom: *Što se zapiše ostaje, a što se pamti iščezava*, zubu vremena otrgnuli smo najznačajnije informacije o aktivnostima realiziranim u Medresi, projektima, tribinama, promocijama, školskim, općinskim i kantonalnim manifestacijama. S obzirom na to da su učenici u ovom periodu na takmičenjima postigli veoma zapažene rezultate, u ovom dijelu su sadržane precizne informacije o takmičenjima, takmičarima i postignutim rezultatima. Također, u *Kapiji 2* sadržane su informacije o profesorima u nastavi i odgoju koji su bili angažirani u radu s učenicima u ovom periodu. Na kraju drugog dijela sadržani su osnovni podaci o maturantima koji su školovanje okončali u školskoj 2013/14. i 2014/15. godini.

Pored toga što *Kapija* predstavlja prostor na kojem će profesori Medrese, a i drugi, objavljivati svoje istraživačke radove iz odgoja, obrazovanja i drugih područja, ona je i vjerni baštinik aktivnosti koje su u određenom periodu realizirali učenici i profesori Medrese. Na ovakav način nastojimo da budućim generacijama osiguramo mogućnost uvida u načine rada s učenicima u oblasti odgoja i obrazovanja.

Otvarajući ovu obimnu svesku, želimo na kraju da iskažemo zahvalnost svima koji su na bilo koji način doprinijeli da *Kapija 2* ugleda svjetlo dana.

## **Urednik**